



PATNUBAY SA MISA



5 Mayo 2019


Ika-3 Linggo ng Pasko ng Muling Pagkabuhay

Taon K

Ang Paghilom na Dulot ng Muling Pagkabuhay

Tayo ay nagdiriwang ng Ikatlong Linggo ng Muling Pagkabuhay. Nakatuon ang Magandang Balita sa pagpapakita ng Panginoong muling nabuhay sa kanyang mga alagad sa tabi ng Lawa ng Galilea. Ang mga alagad ay nasa lilim pa rin ng kanilang pagtalikod sa Panginoon noong siya'y hulihin, hatulang mamatay, at ipako sa krus. Si Pedro ay nababalot pa rin ng kanyang tatlong ulit na pagtatatwa kay Hesus. Silang lahat ay puno pa rin ng lumbay dahil sa nasaksihan nilang pagkamatay ni Hesus at pagkawasak ng kanilang mga pangarap para sa kanilang mga sarili at para sa buong Bayan ng Israel.

Ngunit sa busilak na liwanag ng Muling Pagkabuhay ang lahat ng ito ay bibigyan ng paghilom. Walang hindi kayang ayusin ng Muling Pagkabuhay ni Kristo. Ang lahat ng ating kalungkutan, kabiguan, at kasalanan ay mapapalitan ng kaligayahan, pag-asa, at biyaya dahil ang Panginoon ay buhay na buhay.



PASIMULA



Pambungad

(Ipahahayag lamang kung walang awiting nakahanda.)

Sa D'yos tayo ay magalak, lahat magpuri nang wagas. Sa ngalan n'ya'y ipahayag pagpupuring walang kupas, Aleluyang walang wakas!

Pagbati

P—Ang pagpapala ng ating Panginoong Hesukristong muling nabuhay, ang pag-ibig ng Diyos Ama, at ang pakikipagkaisa ng Espiritu Santo ay sumainyong lahat!

B— At sumaiyo rin!

Pagsisisi

P—Madalas tayong natatalo ng kalungkutan, kabiguan, at kasalanan. Humingi tayo ng tawad sa Diyos at nang mapasaatin ang biyaya ng Muling Pagkabuhay. (Manahimik sandali.)

P—Para sa aming kakulangan ng pananampalataya sa katoto-

hanan ng iyong muling pagkabuhay, Panginoon, kaawaan mo kami!

B—Panginoon, kaawaan mo kami!

P—Para sa aming kakulangan ng pag-asa sa paghilom na dulot ng iyong muling pagkabuhay, Kristo, kaawaan mo kami!

B—Kristo, kaawaan mo kami!

P—Para sa aming kakulangan ng pagmamahal sa iyo, na dapat ipamalas sa pagmamalasakit sa aming kapwa, Panginoon, kaawaan mo kami!

B—Panginoon, kaawaan mo kami!

P—Kaawaan tayo ng makapangyarihang Diyos, patawarin tayo sa ating mga kasalanan, at dalhin tayo sa buhay na walang hanggan.

B— Amen!

Papuri

B—Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasasalamatang ka namin dahil sa dakila mong

angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sa-pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, lagi nawang magalak ang iyong sambayanan sa pagkakaron ng bagong kalooban upang sa kadakilaang dulot ng pag-anib sa iyong angkan, ang araw ng pagkabuhay ay maging pag-asa sa pagdiriwang sa pamamagitan ni Hesukristo kasama ng Espiritu Santo magpasawalang hanggan.

B— Amen!

PAGPAPAHAYAG NG SALITA NG DIYOS



Unang Pagbasa Gw 5:27-32.
40-41

Ang mga apostol ay inuusig na dahil sa kanilang pagpapatotoo kay Kristong Muling Nabuhay. Ngunit ang Diyos na siyang muling bumuhay kay Hesus ang dapat sundin at hindi ang tao, siya man ay ang pinakamataas na pinuno sa Israel.

L – Pagpapahayag mula sa mga Gawa ng mga Apostol

Noong mga araw na iyon: Ang mga Apostol ay siniyasat ng pinakapunong saserdote. “Mahigpit naming ipinagbawal sa inyo ang pangangaral sa pangalan ng Hesus na iyan,” wika niya, “ngunit tingnan ninyo ang inyong ginawa! Laganap na sa Jerusalem ang inyong aral at ibig pa ninyo kaming panagutin sa pagkamatay ng taong iyan!”

Ngunit sumagot si Pedro at ang ibang mga apostol, “Ang Diyos ang dapat naming sundin, hindi ang tao. Ang Diyos ng ating mga ninuno ang muling bumuhay kay Hesus na pinatay ninyo nang inyong ipabitay sa krus. Iniakyat siya ng Diyos sa kanyang kanan bilang Tagapanguna at Tagapagligtas, upang bigyan ng pagkakataon ang mga Israelita na magsisi’t tumalikod sa kanilang mga kasalanan, at sa gayon, sila’y patawarin. Saksi kami sa mga bagay na ito – kami at ang Espiritu Santo na ipinagkaloob ng Diyos sa mga tumatalima sa kanya.”

Pagkatapos pagbawalang mangaral sa pangalan ni Hesus ang mga apostol, sila’y pinalaya. Galak na galak na umalis ang mga apostol sa harap ng Sanedrin sapagkat minarapat ng Diyos na sila’y malagay sa kahihayan alang-alang sa pangalan ni Hesus.

Ang Salita ng Diyos!

B – Salamat sa Diyos!

Salmong Tugunan Awit 29

B – Poong sa aki’y nagligtas, ang dangal mo’y aking galak!

R. M. Velez



Po---ong sa a---ki'y nagligtas, ang



dangal mo'y a---king ga--lak!

* O Panginoon ko, sa iyong ginawa, kita’y pinupuri’t ako’y iniligtas, kaya ang kaaway ay di na nakuhang matuwa’t magalak. Mula sa libingang daigdig ng patay, hinango mo ako at muling binuhay; ako na kasama nilang napabaon sa kailaliman. B.

* Purihin ang Poon, siya ay awitan ng lahat ng tapat na mga hinirang. Iyong gunitain ang mga ginawa ng Diyos na Banal, ang kanyang ginawa ay alalahanin at pasalamat! Hindi nagtatagal yaong kanyang galit, at ang kabutihan niya’y walang wakas. Ang abang may hapis at tigmak sa luha sa buong magdamag, sa bukung-liwayway ay wala nang lungkot, kapalit ay galak. B.

* Kaya’t ako’y dinggin, ikaw ay mahabag sa akin, O Poon, ako ay pakinggan, mahabag ka, Poon! Ako ay dinggin mo at iyong tulungan. Nadama ko’y galak nang iyong hubarin ang aking panluksa. Sa pasasalamat sa iyo, O Poon, ay di magsasawa. B.

Ikalawang Pagbasa Pah 5:
11-14

Ang kamatayan ng Kordero ng Diyos ang nagbigay-daan sa kanyang dakilang kaluwahatian. Ang Korderong pinaslang ay binigyan ng kapangyarihang walang hanggan.

L – Pagpapahayag mula sa Aklat ng Pahayag

Akong si Juan ay tuminging muli at narinig ko ang tinig ng libu-libo’t laksa-laksang anghel. Sila’y nakapaligid sa trono, sa apat na nilalang na buhay, at sa matatanda. Umaawit sila ng ganito: “Ang Korderong pinatay ay karapat-dapat na tumanggap ng kapangyarihan, kayamanan, karunungan, at kalakasan, papuri, paggalang at pagdakila!”

At narinig kong nag-aawitan ang mga nilikhang nasa langit, nasa lupa, nasa ilalim ng lupa, at nasa dagat – lahat ng nilikha sa buong sanlibutan:

“Sa kanya na nakaluklok sa trono, at sa Kordero,

Sumakanila ang kapurihan at karangalan, kadakilaan at kapangyarihan, magpakailanman!”

Tumugong ang apat na nilalang na buhay: “Amen!” At nagpatirapa ang matatanda at nagsisamba.

Ang Salita ng Diyos!

B – Salamat sa Diyos!

Aleluya

B – Aleluya! Aleluya!

Si Kristo’y muling nabuhay! Kanyang nilikha ang tanan, mga tao’y dinamayan. Aleluya! Aleluya!

Mabuting Balita Jn 21:1-19

Ang siping ito sa Ebanghelyo ni Juan ay naglalahad ng pagbabalik ng mga alagad sa Lawa ng Galilea upang harapin muli ang gawaing kanilang iniwan nang sumunod sila kay Hesus.

P – Ang Mabuting Balita ng Panginoon ayon kay San Juan

B – Papuri sa iyo, Panginoon!

Noong panahong iyon: Muling napakita si Hesus sa mga alagad sa tabi ng Lawa ng Tiberias. Ganito ang pangyayari.

Magkakasama sina Simon Pedro, Tomas na tinaguriang Kambal, Natanael na taga-Cana, Galilea, ang mga anak ni Zebedeo, at dalawa pang alagad. Sinabi sa kanila ni Simon Pedro, “Mangingisda ako.” “Sasama kami,” wika nila. Umalis sila at lumulan sa bangka, subalit walang nahuli nang gabing iyon.

Nang magbubukang-liwayway na, tumayo si Hesus sa pampang, subalit hindi siya nakilala ng mga alagad. Sinabi niya, “Mga anak, mayroon ba kayong huli?” “Wala po,” tugon nila.

“Ihulog ninyo ang lambat sa gawing kanan ng bangka at makahuhuli kayo,” sabi ni Hesus. Inihulog nga nila ang lambat at hindi nila ito mahila sa dami ng huli. Sinabi kay Pedro ng alagad na minamahal ni Hesus, “Ang Panginoon iyon!” Nang marinig ito ni Simon Pedro, siya’y nagsuot ng damit sapagkat hubad siya at tumalon sa tubig. Ang kasama niyang mga alagad ay sumapit sa pampang, sakay ng munting bangka, hila-hila ang lambat na puno ng isda. Hindi sila gaanong kalayuan sa pampang – mga siyamnapung metro lamang.

Pag-ahon nila sa pampang ay nakakita sila roon ng mga baga na may isdang nakaihaw, at ilang tinapay. “Magdala kayo rito ng ilang isdang nahuli ninyo,” sabi ni Hesus. Kaya’t sumampa sa bangka si Simon Pedro at hinila sa pampang ang lambat na puno ng malalaking isda – sandaan at limampu’t tatlong lahat. Hindi napunit ang lambat, kahit ganoon karami ang isda. “Halikayo at mag-almusal tayo,” sabi ni Hesus. Isa man sa mga alagad ay walang nangahas magtanong sa kanya kung sino siya, sapagkat alam nila na siya ang Panginoon.

Lumapit si Hesus, kinuha ang tinapay at ibinigay sa kanila, gayon din ang isda. Ito ang ikatlong pagpapakita ni Hesus sa mga alagad pagkatapos na siya'y muling mabuhay.

Pagkakain nila, tinanong ni Hesus si Simon Pedro, "Simon, anak ni Juan, iniibig mo ba ako nang higit kaysa mga ito?" "Opo, Panginoon, nalalaman ninyong iniibig ko kayo," tugon niya. Sinabi sa kanya ni Hesus, "Pakanin mo ang aking mga batang tupa." Muli siyang tinanong ni Hesus, "Simon, anak ni Juan, iniibig mo ba ako?" Sumagot si Pedro, "Opo, Panginoon, nalalaman ninyong iniibig ko kayo." Ani Hesus, "Pangalagaan mo ang aking mga tupa." Pangatlong ulit na tinanong siya ni Hesus, "Simon, anak ni Juan, iniibig mo ba ako?" Nalungkot si Pedro, sapagkat makaitlo siyang tinanong: "Iniibig mo ba ako?" At sumagot siya, "Panginoon, nalalaman po ninyo ang lahat ng bagay; nalalaman ninyong iniibig ko kayo." Sinabi sa kanya ni Hesus, "Pakanin mo ang aking mga tupa. Tandaan mo: noong kabataan mo pa, ikaw ang nagbibihis sa iyong sarili at lumalakad ka kung saan mo ibig. Ngunit pagtanda mo, iuunat mo ang iyong mga kamay at iba ang magbibihis sa iyo at dadalhin ka kung saan hindi mo ibig." Sinabi niya ito upang ipakilala kung paano mamamatay si Pedro at sa gayo'y mapararangalan niya ang Diyos. Pagkatapos, sinabi sa kanya ni Hesus, "Sumunod ka sa akin!"

Ang Mabuting Balita ng Panginoon!

B—Pinupuri ka namin, Panginoon ng Hesukristo!

Homiliya

Sumasampalataya

B— Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P— Hingin natin sa Diyos na lumakas ang ating pananalig sa muling pagkabuhay ni Kristo, kahit tayo ay nagkulang sa ating katapatan sa kaniya. Ang ating sasambitin ay:

B—Amang mapagmahal, pag-alabin Mo ang aming mga puso!

* Para sa mga namumuno sa Simbahan, upang sa kabila ng kanilang mga pagkukulang at pagkakasala, ay lumakas ang kanilang pag-ibig kay Kristo at maalagaang mabuti ang kanyang kawan, manalangin tayo sa Panginoon! **B.**

* Para sa lahat ng mga kabataan ng ating bayan, upang sa taong ito ng mga kabataan ay sumidhi ang kanilang pag-ibig kay Kristo at maging masigasig sa pagtulong sa kanilang kapwa-kabataan, manalangin tayo sa Panginoon! **B.**

* Para sa mga namumuno sa ating bansa, upang makita nila sa wagas na pag-ibig sa Diyos at sa walang pang-iimbot na paglingkod sa taong-bayan ang susi sa buhay na ganap, manalangin tayo sa Panginoon! **B.**

* Para sa mga taong nababalot ng lungkot at kawalan ng pag-asa dahil sa kanilang mga kasalanan, upang sa paghilom na dala ng Muling Pagkabuhay ni Kristo ay matamo nila ang katiwasayan ng kalooban, manalangin tayo sa Panginoon! **B.**

* Para sa ating lahat na nagkakatipon sa masayang pagdiriwang na ito, upang mapatotohanan natin ang Muling Pagkabuhay ni Kristo at hindi tayo matakot sa pagsalungat ng mga kulang ang pananampalataya, manalangin tayo sa Panginoon! **B.**

* Tahimik nating ipanalangin ang ating mga sariling kahilingan. (*Tumigil sandali.*)

Manalangin tayo! **B.**

P— Ama naming muling bumuhay

kay Hesukristo mula sa kamatayan, isugo Mo sa amin ang Espiritu Santo upang hindi kami matalo ng aming mga kamalian at kahinaan at matuto kaming umibig nang tunay sa mga taong ipinadala sa aming buhay ng Iyong Anak na si Hesukristong aming Panginoon.

B—Amen!



P— Manalangin kayo . . .

B— Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P— Ama naming Lumikha, tanggapin mo ang mga alay ng iyong sambayanang natutuwa. Ang pagkabuhay ng iyong Anak na niloob mong aming ikatuwa ngayon ay papagbungahin mo ng galak na mananatili sa amin habang panahon sa pamamagitan niya kasama ng Espiritu Santo magpasawalang hanggan.

B—Amen!

Prepasyo ng Pagkabuhay V

P— Ama naming makapangyarihan, tunay ngang marapat na ikaw ay aming pasalamatan ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Ang katawan ng Anak mong sa krus nabayubay ay handog ng pag-ibig na walang kapantay. Ito ang paghahaing ganap mong kinalugdan. Ito ang nilunggati ng dating pag-aalay. Ang buong sarili ng Anak mong si Hesus ay inihain sa iyo upang kami'y matubos. Siya ang dambana at paring naghahandog. Siya pa rin ang tupang handog na ibinukod.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B— Santo, santo, santo . . .

Pagbubunyi

B— Sa krus mo't pagkabuhay kami'y natubos mong tunay, Poong Hesus naming mahal, ilitas mo kaming tanan ngayon at magpakailanman.

PAKIKINABANG



B– Ama namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos . . .

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B– Panginoon, hindi ako kara-

pat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Halina at pagsaluhan, sabi ni Hesus na mahal, ang aking handang tinapay na sa inyo'y ibibigay. Aleluya, siya'y awitan!

Panalangin Pagkapakinabang

P– Ama naming mapagmahal, tunguhan mo at lingapin ang iyong sambayanan na minarapat mong makinabang sa piging na pangmagpakailanman. Ipagka-loob mong kami'y maluwalhating makarating sa pagkabuhay na

magtatampok sa amin sa iyong piling sa pamamagitan ni Hesuskristo kasama ng Espiritu Santo magpasawalang hanggan.

B– Amen!

PAGWAWAKAS



P– Sumainyo ang Panginoon.

B– At sumaiyo rin!

P– Pagpalain kayo ng makapangyarihang Diyos: Ama at Anak at Espiritu Santo.

B– Amen!

P– Humayo kayo upang mahalín at paglingkuran ang Panginoon.

B– Salamat sa Diyos!

Munting Katesismong Pampaskuwa sa Taon ng mga Kabataan

(P. René T. Lagaya, SDB)

ANG HINDI PAGBAWING PANGAKO NI KRISTO

Panimula: Ang taong magiting ay may *palabra de honor*. May dangal ang kanyang salita. Tinutupad niya ang kanyang sinabi. Ang kanyang pangako ay nakataga sa bato.

Pagpapalalim: Noong magsumpaan ang magkatipang tunay na magmamahalan, ang akala nila ay panghabambuhay ito. Alam nating nagkakasira rin sila. Pati na nga ang mga mag-asawang nagsumpaang magmamahalan hanggang kamatayan ay may ilan ding binabawi ang kanilang sinumpaang. Mabuti na lamang at ibang-iba si Kristo.

Pagbasa: Juan 21:1-19

Buod: Doon sa Cesarea ng Filipos ay sinabi ni Hesus kay Simon: “At sinasabi ko naman sa iyo, ikaw ay **Pedro**, at sa ibabaw ng **batong** ito ay itatayo ko ang aking iglesia, at hindi makapananaig sa kanya kahit ang kapangyarihan ng kamatayan” (Mateo 16:18). Ang pamumuno sa Bagong Bayan ng Diyos ay ipinangako ni Kristo kay Simon. Ngunit ang Pedro at bato ay magkaibang-magkaiba. Kaya nga lamang ay hindi naman nagsalita sa wikang Filipino si Kristo. Kausap niya ang kanyang mga alagad sa wikang

Aramaico. Sa Aramaico ang pangalang Pedro ay **kepha** at ang salita para sa bato ay **kepha** rin.

Subalit sa Huling Hapunan ay ipinaalam ni Hesus na alam niyang itatatwa siya ni Simon Pedro: “Simon, Simon! Makinig ka! Hiniling ni Satan at ipinahintulot naman sa kanya, na kayong lahat ay subukin. Subalit ipinalangin ko na huwag lubusang mawala ang iyong pananampalataya. At kapag nagbalik-loob ka na, patatagin mo ang iyong mga kapatid.” (Lucas 22:31-32) Manghina man ang loob ni Simon Pedro ay siya pa rin ang magpapatag sa kanyang mga kapatid.

Kaya sa huling kabanata ng Ewanghelyo ni Juan ay mababasa ang pagbawi ni Simon Pedro sa kanyang pagtatatwa kay Hesus at ang pagpapanibago ni Hesus ng kanyang pangakong siya pa rin ang mamumuno sa Bagong Bayan ng Diyos. Pag-ibig ang pambawi ni Simon Pedro. Kaya nga lamang ang unang dalawang tanong ni Hesus ay umiikot sa **agapas me?** Ang ibig sabihin ay iniibig mo ba ako ng maka-Diyos na pag-ibig? Kailangang tanungin ni Hesus si Pedro nang makaitlo dahil hindi pa kaya ni Pedrong magmahal ng tulad ng Diyos. Ang ikatlong tanong ay nakatuon sa **phileis me?** Ang ibig sabihin nito ay:

Kaya mo ba akong ibigin tulad ng isang maayos na tao? Tinanggap ni Hesus ang tugon ni Pedro dahil kaya niya itong gawin. Ngunit batid din ni Hesus na sa tamang panahon ay kakayanin din ni Pedro magmahal nang maka-Diyos na pag-ibig. Kinikilala ni Hesus ang kakayahang lumago ni Pedro sa pag-ibig.

Pagsasabuhay: Ang ating mga kabataan ay naghahanap ng pag-ibig. Madalas ay hindi na sila naniniwala sa pag-ibig dahil sa dami ng mga pangakong binawing kanilang nasaksihan. Ngunit mahalagang magbigay ng isa pang pagkakataon. Mababawi naman ng tunay na pag-ibig ang anumang kasalanan. “Sapagkat ang pagmamahal ay pumapawi ng maraming kasalanan” (1Pedro 4:8b). Ang mahalaga ay ang hindi pagtigil sa paglago sa pag-ibig.

Pagdiriwang: “Ama naming makapangyarihan, pag-alabin Mo sa Espiritu ng pag-ibig ang aming kalooban upang lagi naming maisaloob ang minamarapat Mong kalugdan at sa kapwa’y maiukol namin ang wagas na pagmamahal sa pamamagitan ni Hesuskristo kasama ng Espiritu Santo magpasawalang hanggan. Amen!”



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• Illustrations: A. Sarmiento, B. Cleofe • Marketing: Fr. B. Nolasco • Circulation: R. Saldua